

GOSOS DE N. S. DE SU REMEDIU

(Concorso a premio "CITTA' DI OZIERI")

Istella de s'Aurora
Perfetta lughe serena
Salvade a totus de pena
De su Remediu Signora.

De sa Terra sos mortales
Ca non naschen in pureza
Disizzan s'alta difesa ⁽¹⁾ *disizzan*
De donos celestiales
Chi de penas infernales
Los salvet in dogni istante;
Bois chi sezis costante
Cumfortande sos afflittos,
Dades a sos poverittos
Appozu firmu a dognora.
Salvade ecc.

In sa ostra santa vida
No hazis negadu azudu
Né a surdu, né a mudu,
Né a sa zente famida;
De sos ogos sa ferida
Hazis a zurpos sanadu;
Hazis semper preigadu
A ladros e assassinos
Chi lassen tristos caminos
Bessendinde binchidora.
Salvade ecc.

Bois bene a conoschenzia
De sos males de su mundu
Chi cun fervore profundu
Dispensades assistenzia
A sos ch'invocen clemenzia
Pro cummittidos errores;
Chi privades de dolores
Totus sos isfortunados,
De tantos malassortados
Sezis sa consoladora.
Salvade ecc.

Perpetua fiamma divina,
Funtana de caridade,
S'umana commidade
Preservade de ruina;
Faghide chi sa meschina
Undada de ateismu
Sublinada cum cinismu
Siat istruncada in nettu;
Chi s'hapat firmu rispettu
A sa Fide protettora.
Salvade ecc.

Santulussurgiu 31 Agosto 1956

Bachisio Asili
Bachisio Asili